

宛

麥

劬

藏

長春真人遊記

南岳總勝集

崑山郡志

江蘇古籍出版社

宛委別藏

(清) 阮 元 輯

江蘇古籍出版社出版

江蘇廣陵古籍刻印社整理

江蘇省新華書店發行

上海市印刷七廠印刷

開本：七八七×一〇九二毫米 三十二開

印張：一八九七·七五 插頁：四八〇

一九八八年二月第一版

一九八八年二月第一次印刷

ISBN 7-80519-073-9/Z·13
定價：（全120冊） 2550 圓

崑山郡志卷第一

浦城楊諲纂

風俗

崑山自昔號壯邑事最繁劇仍太伯季札之風
崇尚禮遜無復好劍多鬪之舊其民務耕織有
常業多奢少儉競節物信鬼神歲節山寺有歲
懺會一月士女駢闐車蓋相屬上元取鐙於郡
有萬眼羅琉璃球者甲天下鐙月交輝歌管間

作喧咽道路以糖糰春蠶爲節食爆糯穀名亭
婁人各自爆以下一歲之休咎二月望景德寺
有涅槃雙林會尤盛自三月旦爭朝嶽祠四月
浮屠浴佛遍走閭里八日尼寺設飯茶供名無
礙會望日慶山神誕縣迎神設佛老會以祈歲
事里巷以伎樂送神白山塘至邑前幕次相屬
紅翠如畫他州負販而來者駢集後二日觀角
觝於山西八月望西津觀潮官設酌於問潮館

綵旗迎潮觀者如堵十月朔謁墓如寒食不賀
朔謂之鬼節俗重冬至親朋饋送交馳於道臘
月二十四祭竈婦女不與二十五日食赤豆粥
下至婢僕猫犬皆有之有出外者亦分及名口
數粥是日爆竹驅儻田家燃炬名照田蠶歲節
祀先用除夜焚蒼术辟瘟丹家人酌酒分歲夜
分祭瘟鬼易桃符向明打灰堆飲屠蘇此一歲
風俗之大畧惟歲節冬至縣官率邑之寓貴士

友聚拜於學之明倫堂會茶而散禮儀雍雍可
觀始自樂庵李公行之後縣令項公澤又置田
租以充所費云

王峯志

已而富家巨室公私交困

率多替徙市井蕭條如歲懺迎神靈林無礙會
皆僅存其名其取鑑於郡與角觝觀潮等不復
見矣續玉峯志歸附後世變風移不能無異矧
今新治舊本墟落居民鮮少海道朱氏剪荆榛
立第宅招徠蕃舶屯聚糧艘不數年間湊集成

市番漢間處閩廣混居各循土風習俗不一大抵以善貿易好市利尚虛禮美呼稱男子自幼即襲大人衣帽逮長不復冠其信鬼則又加於昔病或不事醫藥惟聽命於神祈賽施捨竭產不悔其朝嶽祠者比屋舉家歲往常熟之福山朝五通者遠至婺源之靈順凡有迎引競巧爭奇尤爲奢靡及文運肇興科舉薦復人皆知讀書爲貴弦誦之聲遍於閭里風俗爲之大變云

山

郡以山得名其山今隸華亭吳地記云陸氏之祖塋於此因生機雲皆負詞學時人以玉出崑岡而名焉今舊州主山蓋馬鞍山云

馬鞍山在舊治西北三里高七十丈上下前後皆擇勝爲僧舍雲窗霧閣間見層出吳人謂真山似假山也

坊

忠政坊趙忠簡府前

狀元坊

石浦

通德坊鄭大資府前

園亭堂庵軒樓附

士大夫生當其時則享園池之樂時之往也昔
之繁華之地果安在哉將不免雍門周之謂乎
故園亭雖廢亦書俾觀者有所警省

縣圃

孫氏園在舊治北

翁氏園在舊治西

陳氏園在舊治南

洪氏園在舊治東並淳祐以前廢

鄭氏園在舊治西北馬鞍山前海陵史君竦
建繼又創退耕堂水竹環茂可容數十客檮
寮張郡之書扁西礪葉丞相書廳之扁曰玉
峯佳處園內西南又有道院庭植洛花數百

本皆吳中所無者今廢

陳氏園在舊治東本洪氏小園後歸澹軒史君陳昌世恕齋洪端明堂扁以四時佳景澹軒之子師尹號石巖增創寬潔有堂曰光風霽月與鄭園退耕不相上下

衛氏園在石浦文節公後樂之地其後子姪各有園今並廢

陳氏園在漳潭水竹寬潔亭館宏麗東浦黃

簡記徐聞詩書

盛氏依綠園在高墟

自鄭園以下並今廢

放生池在清真觀石千里書扁御筆有碑邑

宰項公澤跋

東禪寺後圃池上茅亭吳仁傑取杜詩可以
賦新詩之句名曰可賦范石湖多游息其中
崑山亭邑人趙善訓史君所居距馬鞍山之
陽二百弓而限以小溪吳仁傑取元次山溪

以語名旌吾獨有之句名曰崕山

玩芳亭邑人吳仁傑所居

自茅亭以
下並舊廢

風雲竹月二亭在普照觀前

墨妙亭顧氏西園之亭也軍器同提舉顧信
建在今三皇廟後中藏時賢趙文敏公子昂
親札石刻甚富

逸野堂邑人王僖所居僖累試不第以讀書
自娛鄉里推重教其姪孫葆爲名儒堂廢舊

十六觀堂卽其地或云非也

友順堂邑人衛文節公涇所居也涇未貴時
與兄弟讀書於其間後功名各成乃招師教
子弟此宋寧宗親灑宸翰書扁賜之今廢
棲閑堂邑人龔昱所居也後廢

四賢堂在邑人李潛家潛之祖衡爲御史時
以論張說去國同時得罪者王希呂周必大
莫濟莊治作四賢詩以美之潛乃訪求三賢

遺像配以其祖置堂於家名曰四賢後堂隨
宅售唯存繪像

喜廉堂在邑人陳吏部昌世家吏部自信守
召爲郎天語有一廉可喜之譽遂以名其堂
承訓堂在邑人鄭史君準家其子高郵守孺
葺而居之自謂不墜先訓故以名堂

止足堂在邑人鄭史君鍊家史君薄於榮進
家食踰十年不復作宦游想就其家西南築

一區取知止知足之義以名堂西澗葉丞
相書扁

傳清堂在邑人陳令君明復家蓋取其祖父

清白相傳之義訥軒程丞相書扁

自喜廉堂
以下並歸

附後
廢

資深堂在橘隱處士秦鼎家趙文敏公子昂
書扁

樂庵在舊州東六里圓明村侍御李衡歸老

地也今廢

疊浪軒在馬鞍山北華藏教院下瞰湖濱一
碧千頃詩人名公往往觴詠於此今湖皆爲
田不復見舊觀或解扁字爲車於水宜良云
滄江風月樓惠安樓二樓並在北巷口西舊
酒館也

養壽樓在顧文安家趙文敏公子昂書扁

高節樓在袁德家德母陳氏生德及三女年

二十七而寡義不再適以勤儉守家保育諸
孤皆能成立其甥茅德潤與士大夫游其美
其行相與揭其樓扁曰高節以旌之廣德錢
治爲之記

冢墓

吾邦四郊無曠土先賢故壟惟一邨氏他無聞
焉如天女黃幡綽二墓出於傳疑又不足信其
取斷碑如巴王卜將軍雖不見史傳然俱著地

名並存廟祀姑用以備數焉

古巴王墓在朱塘鄉今有廟農人墾土得斷碑
云彭府君墓在巴王墓南由是知廟下必有墓
但不詳巴王爲何時人

唐卜將軍墓在舊州卜山下嘗有人於廟下采
圃朱四郎家得斷碑畧云府君姓卜名珍字文
超西河人也春秋六十有六以寶曆元年終葬
於崑山西鹿城鄉界卜山禮也銘曰森森古栢

宛轉龍岡孤雲垂蓋日月懸光千秋萬古嗚呼
夜長

宋郊朝散墓在郡郭韓涇北官路東今夷爲民
居神道路石柱具存冢上露石碣云三十朝散
之墓按當是升卿冢今謂其地曰大夫墳內又
有二壟在賈垵門北

劉龍洲墓在慧聚寺東齋後詳見人物門

古蹟

遺蹟所以存古不以其已廢不書惟龍柱及天書已見各條下更不重出

慧聚寺大殿佛像及西偏小殿毗沙門天王像并左右侍立十餘神皆凜凜有生氣塑工妙絕相傳爲楊惠之所作惠之初學畫見吳

道子藝甚高乃更爲塑工遂以能名天下

此像

或又云張愛兒所作

龍圖閣學士徐林

山

嘗歎其妙而

大殿三世佛已爲庸僧妄加塗飾天王像綵

色亦已故暗乃題殿壁云慧聚寺古塑天王
予連日觀瞻徘徊不忍去一綵女尤勝絕絕
與顧愷之畫相類按此寺成於大中
年塑者得非楊惠之流乎今大殿龍像再加綵畫古
意已索然予懼無知者又將脂澤汚圭璧使
唐人遺蹟掃地將歎恨莫及故書以志之初
寺以此像及山半普賢像與涅槃圖爲山中
三絕淳熙寺焚殿皆燼惟普賢像爲一僧背

負而逃

慧聚寺殿前二樓曰經臺鐘臺扁皆李後主
所題

淳熙寺焚臺亦廢

高麗國進陰陽栢兩株高纔二三尺高宗以
賜王綯綯種於永懷寺殿庭之左右寺綯之
祖審琦香火院也後栢長高與殿齊每歲左
花則右實右花則左實

淳熙間華亭縣君民浚河得一碑云天寶六

載黃池縣令朱氏墓於崑山縣全吳鄉孔子

宅之西南今孔宅乃在華亭七十五里海隅

鄉今其地有孔子廟在惠日寺側淳熙間寺

疏陳渠得寶玉凡六事三壁二環一簪今

藏之縣庠舊圖經云昔華亭元屬崑山豈古

全吳鄉廣於今耶今崑山全吳鄉無所謂孔

宅者

柏家灤宋末南渡時水底尚有民家堦礎遺

址此古者民在圩中住居之舊蹟也

野鴨段大泗段湛段及和尚園盛熟園並在

州西皆田園名或謂之段或謂之園也

二事並見

郊
利書
夏水

崑山郡志卷第一

1. 2. 3. 4. 5. 6. 7. 8. 9. 10.

11. 12.

崑山郡志卷第二

浦城楊諲纂

名宦

嘗觀蘇子作遠景樓記自美其州之俗有近古者三其一謂太守縣令則記錄其行事以爲口實至四五十年不忘予竊謂吾州俗之近古者豈止於三守令書之圖經將傳數千世豈止四五十年而已哉然梁適謝深甫葛洪皆宋宰執

嘗爲令丞尉具見題名而舊志不書於名宦豈
無所建置故耶僕今蒐羅史傳自吳以下嘗官
於此者一皆補錄以追簡遠之責云

吳顧雍字元歎吳郡吳人嘗從蔡邕學琴書謂
其必有成致州郡表薦弱冠爲合肥長後轉
在婁曲阿上虞皆有治蹟累官至丞相

宋祖冲之字文遠稽古有機思解鍾律博塞嘗
改何承天麻法姚興指南車及造歌器又體

木牛流馬造一器不因風水自運孝武時歷

婁縣令

梁吳郡陸慶少好學通五經尤明左傳節操甚高仕爲婁縣令以善政聞陳天嘉初徵不至永陽王欲與相見不往後於其宗人陸榮家穿壁得一觀之

陳殷不佞字季卿居喪以孝稱好讀書尤長於吏術梁承聖初爲武康令有惠政孝武受禪

除婁令

唐王嵩幽州人王適之父也爲崑山丞

齊融越州人爲崑山令與於休烈賀朝萬包

融爲文詞之友齊名一時

李家太宗第十子紀王慎之元孫爲縣令

王綱以大理司直充縣令政務化民始建縣

學

孟庭份爲尉郊之父也能詩生郊於此後以

詩名於世

擢立爲主簿德輿之從兄敏於學行簿於宦
名德輿嘗作序送之

劉綺莊爲尉研窮今古博考傳記作類書百
卷行於世名崑山編

宋邊倣雍熙初爲令因舊地新作天子廟自是
縣學復興時錢氏初納土倣首爲宰而有
賢行上賜璽書獎勞

梁適字仲賢鄆州項城人顛之子也真宗朝

以獻書授秘書省正字舉進士改太子中

允知淮陽軍官至丞相

按東都事畧未見為崑山令

張方平景祐初為令時吳越歸國未久前豪

民占田者多積訟有數十年不決者公召

問所輸租稅幾何大率百纔一二乃悉收

其羨田以賦貧民訟亦息時蔣堂魯守郡

得公所著芻蕘論上之遂薦舉賢良科後

至宰相

韓正彥字師德魏公之姪嘉祐中爲令葺石
堤䟽斗門作塘七十里以達於郡得膏腴
田數百頃又請以輸州之賦十三萬從便
輸於縣鳩作塘餘材爲縣倉以儲之民大
悅比去遮道以留爲立生祠作思韓記鏡
石祠下

張漢之爲令其父兩爲憲漕五領郡符而家

管子山君
極清貧漢之政務寬厚尤緩於索租邑人
戲爲言曰渠家自來無此故不欲與人索
也

潘友文字文叔東萊先生之友爲政寬厚慈
祥愛人俗呼爲潘佛子秩滿爭結綵樓於
路號曰去思植桃於山題詠甚多

王萬樞韶之曾孫遂之父爲尉得海盜溢格
吏請出郊以應親獲之文萬樞據實卻之

其有守如此

陳璧字君玉爲主簿留意教養作成士子講
論勸勉不憚其勞邑人造問者無虛日所
成就極多

程沂字詠之西洛人文簡翁之曾孫伊川先
生願之姪也紹興間以右通直郎知縣事
爲政中和有古循吏風嘗修縣庠張無垢
爲記欲鐫之石或謂其託此以諷朝士尋

已之

謝深甫天台人爲丞寧宗朝拜右丞相

葛洪爲尉理宗朝拜僉書樞密院事

項公澤字德潤永嘉人淳祐間自長洲丞辟

宰崑山縣令自李統滿秩更十三任不以

善去公澤白童科擢第以文學飾吏事留

意學校買田養士爲政廉敏百廢具舉多

所增叙秩滿造朝嘗丞國子宗正知安吉

州

吳堅字彥愷天台人淳祐中爲簿畱意教養
詣學講肄無虛日以厚風俗正人倫明義
利闢姦邪爲先務在任多所增勑後累登
清要德佑末年拜左丞相京城降爲祈請
使入天都

本朝王安貞字吉卿彰德安陽人以中書僉寫
補浙西帥府掾至元二十九年授將仕郎

浙省理問知事元貞初遷從仕郎台州經歷江浙省答刺罕丞相勾補省掾大德七年改承事郎温州永嘉縣尹平反張明一等冤獄全活二十三人正偽造鈔曹元三之罪民大悅服至大三年擢奉訓大夫工部主事銜

命江西省拯治錢糧事畢除宣徽院都事
再

命與速古兒赤哈只必閣赤汪古充深入
怯魯連迄北計點達達戶計以功陞朝列
大夫崑山知州旣任適州初遷公衙以下
百未一具以舊郭民不樂遷所合建置存
舊營新其所勅置分見各門且善於規畫
民不知擾始終以教養恤民爲意秩滿改
授饒州路治中

那懷本蒙古斡吉刺氏泰定初以武德將軍

爲達魯花赤時州遷一紀公廨未建公即募各保里正量其事力分占名項出財營造使人有術民皆樂從且有巧思指畫間架良匠不能踰其度所役夫工皆吏貼及營卒輩雇覓間用警跡役徒故雖營造盛興居民無擾其所剏建備具志中先是上司官至器皿鋪蓋悉假於豪民當坊役者不勝勞擾於是公罰錢造銀器數百事

紳絲毯褥三數十條其適用什物莫不畢備名件備見州廳石刻公雖目不知書而凡所涉歷終不遺忘敬儒重老人以是推之秩滿改授福寧州達魯花赤

姜復昌號漁所宋死節忠臣淮東都統才之孫也父文龍歸附後因官居嘉興遂爲嘉興人泰定初復昌以敦武校尉爲州判官先是知州錢也先伯泛差協濟戶不預定

姓名隨所逮得方填文引農民不敢出市
下保勾輯在所抗拒殊失官府氣象及公
蒞任雖居末位出身任事拯治一新及津
助法行以廉幹摘委與省委官覈實民產
酌量助役輕重得宜抑強扶弱放免小戶
里正一百十三名邦民稱頌殆不容口薦
膺省委覈湖州僧田助役咸愜輿論公循
常氣貌和粹及政有不便執理力爭辭色

不少假雖長官獷悍亦爲之下性尤不事
虛飾湖州助役回反此任滿祖帳加倍於
常皆約以遠日夜潛移舟去士民追餞不
及而反次倅瑞安亦多政蹟

八資刺字思齊畏吾人民以世祿歷侍儀使
至元丙子任監州爲政微敏理斷詳審民
皆愜服疑辭寃訟多所平反性尤好士日
延接不倦先有儉人睥睨學廩將郡庠諸

生屏斥一空且立石公堂絕其復籍蹊徑
前監郡德安仁賢有文推誠待士深念其
寃欲復之以丁艱不果殆公至廟學廢益
甚躋彼公堂如入無人之境公惻然曰設
學校以養士風化之本也逐士殷學非盛
世所宜舉廢興復其有司之責乎即度材
鳩工遴選廉幹吏王復初典吏陳大年重
脩文廟鼎建採芹亭彩繪髹漆焚砌版築

不踰時與然一新遂復諸生籍毀黨錮碑
作起儒風民俗大變復建州解後堂皆不
擾而辨工甫畢即解綬去祖悵盈途自樵
樓至西關不絕士庶攀畱脫靴截鐙幾不
容去

勃羅帖穆爾字存中號一齋唐兀人氏祖忽
刺出銀青榮祿大夫湖廣省丞相父徹里
帖木兒中奉大夫湖廣省叅知政事公以

相門世祿初授承務郎直省舍人陞奉訓
大夫武備寺丞歷大府監提點至正辛巳
冬以奉議大夫來爲監州初下車適立都
水庸田使司開濬河道公受委提調日冒
風雪罔憚勞苦而以矜恤爲意故民樂於
趨役不擾而事集尤畱心學校捐貲率先
置造大成雅樂及成此郡志又嘗施已粟
拯被火人戶一百餘家適值亢旱公長齋

蔬食曝於烈日以事禱祈因以致疾而不
憚也暇日則延儒生講論義理擇善而行
惟恐弗及臨民以仁恕稱美政日聞人皆
以遠大期之行秉政綱以盡其所蘊

封爵

古之封建分茅列土開國承家授之封爵惟宗
位號而已所以書之者以見國邑之舊也

見三國志

婁侯

張昭輔吳將軍

宋

崑山縣開國侯

□□

崑山縣開國伯

衛涇

端明僉樞
兼參

崑山縣開國子

范之柔 禮部尚書

崑山縣開國男

衛涇 特左侍郎兼侍讀

鄭準 中奉大夫

鄭竦 奉直大夫

崑山郡志卷第二

山口君

十一

崑山郡志卷第三

浦城楊諫纂

進士題名

吾邦人材之盛在宋嘗出大魁科第相望見之
題名爲鄰邑最中雖更世故然弦誦不輟惟今
文運肇興郡侯勉勵作成將見名香淡墨歲有
其人不使文節輩專美於前也

端拱元年程宿榜

龔識默甫 殿中侍御史

天聖五年王堯臣榜

龔宗元會之識子都官郎官
龔題名石並不見

嘉祐二年章衡榜

郊宣正夫 比部郎中

治平二年彭汝礪榜

孫載積中 朝議大夫
河東通判

熙寧六年余中榜

龔程信民 宗元子

崇寧五年蔡幾榜

龔况濬之

程子 祠部員外郎
二龔題名石並不見

政和五年何棗榜

唐輝子明 禮部侍郎

黃偉時俊 朝奉大夫

政和八年王嘉榜

衛闡致虛 大學博士朝奉大夫

張德本復之

宣和六年沈晦榜

王葆彦光 監察御史

范雱伯達 秘書郎

建炎二年李易榜

唐煜子光 煇弟 朝請大夫

馬友直伯忠 特科宣教郎

紹興二年張九成榜

尤著少蒙 承議郎

紹興五年汪應辰榜

郊升卿師古 宣孫朝散郎知常州

范成象至先 雱兄之子工部郎中

王嘉彥邦美 葆元之子

紹興八年黃公度榜

沈詢嘉問 奉議郎知温州瑞安縣
今崇明州西沙

紹興十三年陳誠之榜

嚴煥子文

題名石不見

素鼈可久

陳壽器則

鄭希顏君亞

張之才周美
特科

紹興十五年劉章榜

李衡彥平
侍御史

邊惇德公辯
特舉
第三
通直郎

顧聞彥和 特科

紹興二十一年趙遠勝

成端亮伯準

紹興二十四年張孝祥勝

陳九思希魯 甲科

鄭鎮公玉

范成大至能 雱子參知政事

樂備功成 將作監簿 軍器監簿
題名石字順之

趙彥竦欽仲 題名石字德振

趙公高成甫 宣教郎

賀三聘湯輔 宣教郎

素宗仁壽卿 鰲子 書庫官

姚申之崧卿

李廷直世南

成欽亮仲鄰 端亮弟 朝奉大夫知峽州

乾道二年蕭國梁榜

葉季亨時質

特科
題名石作

葉時亨季質

林梓材卿特舉

乾道五年鄭僑榜

辛機應仲

陳茂膺季實

王邁德遠

陳九德希樂

九思弟
通直郎

潘孜道任特科承議郎賜緋

錢永弼叔憲 特科

乾道八年黃定榜

范之柔叔剛 禮部尚書

范藻德明 成象子 題名石字孟明

宋光遠民望

趙善遠道卿

秦膺剛和仲 特科

龔明之希仲 特科
宣教郎賜緋

淳熙二年詹駉榜

張舜卿次夔

之才子

陳宗召景南

禮部尚書

王嘉謀叔明

特科

陸自新德輝

特科

石名自新

胡元佐德懋

特科

石名堯佐

辛元膺應辰

特科

周良臣君顯

特科

淳熙五年姚頴榜

吳仁傑斗南

國子錄

顧澈伯澄

特科

淳熙八年黃由榜

黃真卿元吉

特科

淳熙十一年衛涇榜

衛涇清叔

聞孫

狀元

參知政事

呂伯奮忠甫

夏允中彥執

翁謙天益

李應祥夢龍

顏叔淵養源

特科
題名石不見

張左右民

特科
題名石在十六年

李煜良佐 特科

紹熙元年余復榜

李起宗揚祖

應祥弟
題名石作兄

顏叔玠景珪 度弟之子

趙善遠衛卿 善遠弟 題名石作兄

顏叔平景晏 度子

陳振震亨 太府寺丞

顏應叔修 度弟 題名石字仲修

朱起宗元振 特科

胡椿德進 特科

鄭允文元修 續兄 特科

紹熙四年陳亮榜

張松子觀

慶元二年鄒應龍榜

鄭準器先 中奉大夫

王芹元采 特科 題名石在慶元三年

慶元五年曾從龍榜

陳貴誼正夫 宗召子 參知政事

顏叔瑤粹中 叔玠弟

衛沂與叔

潘興嗣顯祖

教陶孫器之 題名石不見

沈晞顏文仲 特科

嘉泰二年傅行簡榜

趙緜君善 直寶章閣

楊沂希黯 題名石作楊昨世南

沈誠天瑞 詢孫州西坑治所幹官

博學宏詞科一人

陳貴謙益父

嘉泰三年以兩經幸學恩愛土州文學三人

顏叔升景容

度姪
特科

林溥景仁

開禧元年毛自知勝

江元子朋

朝請大夫

趙汝浮予埜

二人題名石並不見

顏叔璵器之度姪特科

邊瀛道卿博德子特科

嘉定元年鄭自誠榜

衛洙魯叔涇弟石右司郎不見

衛洽晉叔涇弟石字晉卿

素宗魯道卿宗仁弟特科

鄭敷王休特科

博學宏詞科一人

陳貴誼正夫 慶元五年進士

嘉定四年趙建大榜

嵇源子長 上舍

呂叔獻恭父 伯奮弟 特科

胡天選賢卿 特科

嘉定七年素甫榜

衛洙魯叔 涇弟 再及第

黃必大昌卿

王杲卿 踰 特科

嘉定十年 吳潛 榜

王圭 君玉

嘉定十三年 劉渭 榜

黃係大 和卿 省元 大弟

鄭韋文 捷 準兄 特科

嘉定十六年 蔣重珍 榜

蔡珏 珍父 內舍

郁雲景龍

內舍 異姪

黃洙魯叔

特科 題名石字魯卿

紹定二年黃樸榜

郁中正叔

雲弟 異姪 內舍 題名石字允叔

顧然雍叔

特科

沈逢原深甫

特科

郭思義得甫

特科

端平二年吳叔告榜

陳洪泰亨振弟第四甲出身

嘉熙二年周坦勝

劉必成興謀右科狀元

淳祐元年徐儼夫勝

邊應升子用惇德孫奏名第三等

淳祐七年張淵微勝

素逢午申甫宗仁姪奏名第四等大學

寶祐元年姚勉勝

李特昭進叔 第三甲出
舍選

寶祐四年文天祥榜

邊雲遇龍光 應升次子
第二甲及第

王體文堯章 上舍
第四甲出身

開慶元年周震炎榜

林文龍用雨

景定三年方山京榜

凌萬頃叔度 第四甲出身
直學四請

張喜子明

咸淳元年阮登炳榜

高烈和父

大學前廊釋褐出身
題名石字建大

宗室覃恩

趙必焄茂可

甲子監請文解
乙丑銓中出身

郁紹庭繼文

中子雲姪
異姪孫
夢燭弟兩請

郁夢蟠敬甫

雲姪
異姪孫
紹庭兄奏名

咸淳四年陳文龍榜

徐功甫文敏奏名

崑山郡志卷第三

崑山郡志卷第四

浦城楊諲纂

人物

人物鍾山川之秀爲郡邑之華所宜詳錄以後
簡編惟晉陸機今維隨地屬華亭然舊爲崑山
所繞故以其冠於篇唐宋人物舊有紀載今自
創開海道人材輩出不可殫記姑以其所聞者
錄於此非敢有所取舍也

後漢婁縣卞崇桓帝時吳郡太守薛固爲法吏
所繩下廷尉崇與同郡烏程錢讓詣闕稱
寃廷尉囚崇等以兵圍守苦毒持之崇讓
恬然自若抗聲彌厲天子聞而竒之乃赦
固之罪

晉陸機字士衡祖遜父抗並吳將相機長七尺
聲如巨鐘天才逸秀閉門勤學非禮不動
太康末與弟雲入洛張華謂伐吳之役利

在獲二俊遂延譽薦之成都王頴假機後
將軍河北大都督宦人孟玖譖機於頴遂
遇害葛洪稱機文猶元圃積玉無非夜光
五河吐流泉源如一其洪麗妍瞻英銳漂
逸亦一代之絕所著文章三百餘篇行於
世弟雲字士龍六歲能屬文性情正有才
理與兄齊名雖文章不及而持論過之號
二陸舉賢良時年十六吳平入洛周浚謂

爲當今之類子補浚儀令後百姓圖形配
食縣社入拜中書侍郎亦爲類所害著文
章及新書三百餘篇

唐張後允字嗣宗祖僧紹梁零陵太守父冲陳
國子博士入隋爲漢王諒并州博士入隋
爲漢王諒并州博士後允以學行見稱授
太宗春秋左氏傳封新野縣公終散騎常
侍贈禮部侍郎謚曰康

唐書

史德義咸寧初隱居虎邱山以琴書自適或
騎牛常帶瓢出入郊郭東野號爲逸人高
宗聞其名召赴洛陽尋稱疾歸公卿皆賦
詩餞別德義亦以詩留贈其文甚美天受
初江南道宣勞使周興表薦則天授諫議
大夫興敗後放歸邱壑

唐書

陶規以文學自許生知八音不謀宦游富業
擇人不欺者悉付之身泛江湖遍游烟水

往往數年不歸製三舟一自載一置賓客
一貯飲饌與客孟彥深孟雲卿焦遂共載
逢山水則窮其勝開元末名聞朝廷經過
郡邑靡不招之覘不肯來自謂麋鹿野人
非王公上客亦有不招而自請者吳越之
士號爲水仙嘗慕謝康樂之爲人終當樂
死山水浪蹟三十年後遊襄陽西塞歸老
於吳唐書

宋龔識字嘿甫給事中慎儀之子登端拱進士
第祥符間翰林學士李宗諤薦擢監察御
史遷殿中侍御史兼左巡使宋龔唐制御
史不專言職至是始擇學術醇正操履端
方可紀綱朝廷者俾入臺言事蓋始於識
亦宋吳士登科之首也踰年以日疾累表
乞退遂除檢校司封郎官平江軍節度副
使子宗元字會之幼穎悟絕人讀書虎邱

爲鄉貢首選天聖五年擢進士第徙居黃
姑嘗通判衢越二州終都官員外郎有文
集十卷號武邱居士遺稿子程字信民剛
正自守不怵於禍福力學排異端家不設
佛老像祭祀不焚紙錢讀書南峯攻苦食
淡遂極博羣書鄉人號有脚書櫥熙寧六
年登進士第終桐廬令子况字濬之崇寧
五年進士館以學術文章與蘇過在朝俱

知名時號龔蘇用宗元中隱故事自號起
隱子終祠部員外郎有起隱集三卷子明
之字希仲有孝行終宣教郎子昱字邱道
有文學安貧樂道鄉人稱爲龔山長

郝亶字正夫太倉農家子自幼知讀書識度
不凡登嘉祐進士第崑山自宋以來登科
者自亶始初授睦州團練推官知杭州於
潛縣未赴以水利役法鹽銅酒五利爲書

上之丞相王安石奇之熙寧中除司農寺丞旋出提舉兩浙水利議者以其說非便遂罷歸治所居之西水田曰大泗漕者如所獻之說爲圩岸溝洫井澮塲圃俱用井田之制歲入甚厚圖狀以獻且以明前法非苟然者復召爲司農寺簿遷丞除江東運判元祐初入爲太府丞出知溫州以比部郎中召未至卒年六十六子僑字子高

員才挺特爲荆公所器許鄉人謂之郟長
官晚歲自號凝和子亶孫升卿字師古紹
興進士知常徽二州

孫載字積中曾祖漢英仕錢氏爲蘇州崑山
鎮遏使故爲崑山人登治平進士第爲河
中府戶曹遷知湖州德清縣並有惠政遷
知考城縣一日巡尉來告盜集境上將以
上元掠近郭至期公張燈樂飲許民嬉遊

不禁夜如故事盜叵測遂遁去迄受代無
復鼠竊者以薦除廣東常平哲宗授通判
陝州移廣東轉運判官紹聖初復常平官
除公河北西路改知海州已而除沂州遷
朝奉大夫知婺州移河東路轉運判官又
移涯西踏提點刑獄徽宗即位遷朝請大
夫知亳州所在治務大體時號循吏以嘗
薦元祐黨人得提舉杭州洞霄宮以歸大

觀中遷朝議大夫未幾上章乞守本官致
仕一日徧謁先壠及嘗與往來者呼妻子
與訣問日早晏焚香而逝年七十五性無
伎嗜好汲引士類薦者四百餘人多至貴
顯少喜易著易釋解五卷文集五十卷

唐煇字子明吳郡人寓居崑山以文章名於
時登政和進士第仕至禮部侍郎弟煜建
炎進士子口壽隆興進士其後多居城中

居於邑者曰叔達官至通直郎賜緋年及九十猶強健

王葆字彥光逸野堂僖之姪崑山自孫載登第甲子一周葆始登宣和第邑人美之葆學行俱高潛心古道人皆稱爲鄉先生初主麗水簿上疏論十弊末以儲嗣爲請語尤切直及和議成葆爲宗正寺簿上書秦檜言伊周去畱之得失後爲司封郎官一

日檜語葆曰檜欲告老如何葆曰此事不當問葆檜曰他人不敢言以公有直氣故問爾紹興八年檜爲右丞相問向勸去位以全功名今何故不言葆曰果欲告老不問親讎擇可任國家之事者使居相位誠天下生民之福檜默然俄除監察御史兼崇政殿說書檜薨出知廣德移漢州又移瀘州終浙東提刑葆於人物鑒裁尤精侍

御李衡樂庵布衣流落即妻以女弟丞相
周益公必大初登第即妻以女人皆服其
知人弟萬姪嘉彥中進士第嘉謀奏名

揚則之字彞老外崗人也嘗學詩於西湖順

老學禪於大覺璉禪師詩號禪外集禪學

有十元談參同契俱行於世

中吳紀聞
今嘉定

馬友直字伯忠其先本姓司馬氏有名球者
任吳越以御史中丞爲崑山鎮遏使因家

馬子孫樂道不仕隨俗止稱馬氏聚族居
全吳鄉之六直里素著孝義兄弟六人皆
力穡獨友直以儒業自奮入太學迨宣和
水災兄弟皆狼狽營妻子友直獨迎其親
徙邑之進賢里僦第以居躬菽水養建炎
奏名主武康簿奉嶽祠尋以宣教郎致仕
孫先學字伊紹興進士爲架閣號得間
郭章字仲達幼工於文遊京師太學有聲因

歸鄉省親作詩別同舍有掠過短策驚鳥脫
 兔踏翻紅葉開歸鴉又有詩云中原百甓
 知誰運今日分陰敢自閑之句皆傳播一
 時以守城功拜官被薦居師幕久之官至

通直郎卒於京師年四十餘無子

中吳紀聞

張匯字朝宗其先濮人文潞公洛陽耆英會
 有龍圖閣直學士張燾即匯之祖也匯當
 南渡初五為浙漕時宰臣開督府分道遣

兵詔匯隨軍應副不限以路匯歷江淮歸
浙建臺玉峯因家焉嘗卿棘寺以刑清有
詔褒曰體好生之德行寬大之政等語其
家珍藏此詔後游歷麾節終於中大夫直
寶文閣子孫爲崑山人文脉不絕

王綯字唐公秦正懿王審琦五世孫建炎已
酉爲御史中丞自建康扈從至鎮江從容
奏曰陳東以忠諫被誅此其鄉里也上即

命調其家官其子絢自資政殿學士權太子少傅未幾拜參知政事及車駕幸會稽韓世忠邀擊敵歸騎於揚子江絢議遣兵追襲與世忠夾擊之同政者議不合遂求去御書霖雨思賢佐一聯以賜之絢雖爲執政其家甚貧以祿不及親自奉儉薄無第宅寓東禪僧舍蕭然一室服食器用如寒士天性仁孝調恤姍族無所不至紹興

七年薨年六十四前二日書戊戌字示左
右及薨果戊戌也其前知如此謚文恭綸
所著述有內外制四十卷奏議三十卷進
讀事實五卷論語解三十卷孝經解五卷
羣史編八十卷內典畧錄百卷

李衡字彥平本江都人避地於崑山登紹興
進士第爲溧陽宰以德化民四年無犯死
罪者剡章交上召對陳便民十事除知溫

州未行擢監察御史出知婺州召拜司封
郎官遷樞密院檢詳俄引年掛冠築庵圓
明村自號樂庵餘落致仕除侍御史同知
貢舉因上疏論張說不當居樞筦遷起居
郎不就知台州又不就復上章請老時王
希呂爲右正言亦力殫之莫濟爲給事中
不書黃周必大直學士院不草制皆遭遷
逐布衣莊冶作四賢詩以美之衡道學精

明且樂於教人自中年後絕欲清脩惟一
蒼頭給事故年幾八十視聽不衰少年有
所不及一夕作手書數十紙遍別親友且
戒其子不得齋僧供佛復問天色何時答
以月明脩然而逝所著文章甚多號樂庵
集又有易說論語說若干卷子應祥起宗
相繼登第孫潛淳祐奏名

范成大字至能後居石湖號石湖居士父雱

宣和進士終祕書郎成大登紹興進士第
嘗仗節使北北伏穹廬不起袖出私書切
責之其所負不凡類此帥江東陸辭上以
縑素書石湖二大字賜之後見東宮曰石
湖已拜宸翰有壽櫟堂願得寶書太子書
三大字賜之乃併刻於堂榜曰重奎隆興
中拜中書舍人參知政事薨贈大師諡文
穆有石湖集百三十六卷吳門志五十卷

使北有攬轡錄過海有虞衡志出蜀有船
錄弟成象紹興進士姪藻乾道進士

周煥卿與侍郎張九成爲布衣交相與之意

極厚煥卿有母喪貧不能舉有妹未嫁九

成自貶所專价齋銀錢供其費書辭懇惻

讀之令人竦然生敬煥卿雖事業無所見

然九成眷愛如此其賢可知矣

中吳紀聞

邊惇德字公辯本開封人樞密直學士肅四

世孫祖珉居蘇城惇德遂家於崑山幼孤
至孝貧不廢禮以詩文名一時屢與石湖
唱和以連五薦就奏名第三歷任舉員及
格會舉將坐累失改秩年踰六旬即挂冠
賞格儒林例改宣教鄉達列其行特改陞
朝仍著爲令有脂韋子五十卷孫應升連
捧三薦淳祐奏名終丹徒簿

樂備字功成本淮海人寓居崑山以詩文名

於時登紹興進士第仕至軍器監簿與范
石湖諸公共結詩社

顏度字魯子充國公五十三世孫由唐魯公
兄子仕常熟遂爲吳人後寓居崑山以文
章政事名一時登紹興進士第仕至工部
侍郎孝宗謂度每出一言不動如山因以
自號弟愿子叔平姪叔玠叔瑤叔淵皆及
第叔璵奏名其子孫諸族皆居城中仕者

尚多

吳仁傑字斗南以詩文名一時登淳熙進士
第仕至國子錄自號蠹隱所著書多行於
世

素宗仁字壽卿父鼈紹興進士宗仁登乾道
進士第仕至國子監書庫官以文名於鄉
弟宗魯嘉定奏名姪惟寅中鎖廳應酉捧
鄉書逢午由太學奏名爲安吉主簿

衛涇字清叔祖闡政和進士終太博涇淳熙
大魁當韓侂胄用事時不爲休罷歸十年
不調後除御史中丞與誅侂胄功拜參知
政事後以金紫光祿大夫致仕薨贈太師
封秦國公諡文穆改諡文節從元沂慶元
進士奉化王簿從弟洙弟洽並嘉定進士
洙官至右司郎中弟湜屢中鎖廳嘗編禮
記集解後除太府寺丞將作少監皆不赴

終直寶謨閣子樵魁銓闈又魁鎖廳終知
信州樸中鎖廳終倉部郎官禱魁國子終
太社令析魁銓闈中鎖廳婺州通判諸孫
仕者尚多亦屢有中鎖廳者

陳宗召字景南本福清人因贅而居登淳熙
進士第終禮部尚書三子貴謙祕閣修撰
貴熙尚左郎官貴誼慶元進士端平間拜
參知政事垂將大拜薨謚文定宗召貴謙

貴誼俱中宏詞

范之柔字叔剛文正公之五世孫登乾道進士第仕至禮部尚書贈特進端明殿學士謚清憲子克家寧家寧家官奉議郎之柔弟良遂字次卿卜築江上且耕且讀自號墨莊其子慶家通判建康府

劉過字改之自號龍洲本廬陵人客崑山依妻家而居過爲人尚氣喜飲酒爲詞章豪

放斗酒賦肴風雨渡江豈不快哉等詞皆
行於世叩閣一書請光宗過宮言極剴切
尤諸公所稱許死葬於馬鞍山東齊之西
岡佛殿後陳止安誌其墓其後詩人即東
齊爲祠每暮春縣官率士友酌祠下貳卿
湯口口中嘗作文遣祭及詩人弔詠俱畱
祠壁邑人呂大中裛諸詩作楚些餘音流
行

呂伯奮字忠甫登淳熙進士第幼與其弟仲
堪叔獻皆中童科名公賦者甚衆

趙監字孺文丞相忠簡公之孫來贅范端明
之女兒因家焉終於知興國軍子緜字君
善嘉泰進士歷官宗正丞都官郎官理宗
欲用爲諫官有阻之者出知吉州不上賦
祠官祿六年遂挂冠除直祕閣進直寶章
以朝散大夫終年七十八自號頡庵又號

如舟清脩寡欲室無媵妾家乏於財惟藏
書萬卷死後有人夢其旌旂簫樂導從甚
都疑爲仙班中人也子序孫勤俱世共賞
王邁字德遠本安吉人因贅而家焉登乾道
第終通判太平州子圭字君玉嘉定進士
主松陽簿就爲今行經界爲天下式後知
常州入爲司封郎官終朝散大夫自號靜
觀其居官廉家無餘貲子敏學彊學俱受

父蔭歷官廉謹

陳振字震亨其先古靈之後父遵來贅李樂庵女因家焉遵死家貧謀墓地於圓明術者云不利長子長子即振也振曰使親藏得寧或不利於某二弟尚可主祭遂塋焉後振登紹興進士第歷太府寺丞知永瑞州以朝議大夫致仕自號止安居士弟拱登端平科人遂以此地爲邑之最吉振雅

好楷書急義樂善有文集五十卷行于世
子昌世三中鎖廳由太府丞知信州以吏
郎召見理宗有一廉可喜之褒後知瑞州
終朝散大夫所至有遺愛自奉極淡薄故
自號澹軒其長子師尹魁鄉薦次子明復
魁銓闈中鎖廳歷鹽官簿宰象山
教陶孫字器之本長樂人因贅而居登慶元
進士第官奉議郎僉判泉州自號瞿庵以

詩名於時而復以詩得罪於朝然詩益高
名益重

鄭準字器先本開封人華原郡王之諸孫祖
父皆寓居崑山準由蔭補魁銓闈登慶元
進士第歷知袁州終於中奉大夫薄於功
名厚於道義輕財好士及買田以贍姻族
人以是稱之子竝竝端端歷淮東提刑知
高郵歸附時知江陰姪端竦端中鎖廳竦

歷知秦邵韶三州以奉直大夫奉祠

劉必成字與謀居邑之湓浦其先福安人必成少遊京庠即馳雋聲嘉熙丁酉七士同扣閣言時事必成實爲之倡是年七士俱與計偕而必成爲武舉解奎戊戌遂魁天下巳酉中鎖廳蓋文武全才自負也嘗兩入閣輪對言邊事援古證今玉音褒獎次日宣諭宰執曰劉某所言極好歷守清澗

終於湖南副郎自號愛閑翁

崑山郡志卷第四

13 1914-1915

114

崑山郡志卷第五

浦城楊諫纂

人物

本朝朱清字澄叔揚州崇明西沙人性剛果至
元乙亥大兵徇西沙遂降焉丞相伯顏器
之署爲管軍千戶繼運宋帑藏赴北復從
征甌閩真授千戶武畧將軍佩金符己卯
從征日本壬午創開海運實預奇謀丁亥

累遷至昭武大將軍遙授江東道宣慰使
行海道運糧萬戶府事遷居太倉戊子授
鎮國上將軍其授江東道宣慰使兼領漕
事庚寅運高麗遼陽糧樞密院奏功進驃
騎衛上將軍餘如故設立漕府保用虎符
萬戶一十二員金符千戶六十四員銀符
百戶六十員特頒銀印以寵之至今循用
公於建康奏蠲淘金役免溧陽歲貢珠米

以蘇民瘼討平涇縣反叛趙良繪功績著
聞元貞丙申授資善大夫河南行省叅知
政事大德己亥就任陞資德大夫大司農
庚子就陞左丞賜以玉帶癸卯忌者擠之
憤卒年六十七子五人顯祖號東山忠顯
校尉海運千戶虎字堯臣號中山嘗從征
交趾累官至昭勇大將軍都水旭字子陽
號次山自稱希古道人忠顯校尉海運千

戶完者都自娛孜孜爲善日延文士舉觴
賡酬講論義理老不知倦人以是賢之又
構二亭於府城別墅曰寒碧香晚趙文敏
公子昂書匾翰林滕玉霄提譽白湛淵當
代名賢俱有記述題詠

朱日新號中齋本楊氏幼爲左丞朱清所鞠
故姓朱未冠已歷仕三授海運千戶繼入
爲舍里八赤奏賜全副只孫元貞乙未授

宣武將軍婺州路總管居官廉慎賦役公平政刑不濫嘗平反冤獄數起上下愜服官宇脩葺水旱禱祈悉用已貲不費公帑歉歲出已粟平糶旋行賑卹民感其惠爲立碑頌德秩滿自帥府憲司以及州縣儒醫僧道鎮戍軍民各狀挽留前政所未有也政授江州路總管已而坐義父朱清寧解官居嘉定之揚恭日延賓燕談以樂其

暮年云

徐興祖號敬齋世居崇明祖文明韜光不興
興祖顯贈懷遠大將軍平江十字路萬戶
父貴仕宋爲統制歸附後累官海漕終於
武德將軍上副萬戶卒贈昭勇大將軍亳
州萬戶與文明並追封東海郡侯興祖隨
父歸附屬元帥張宏範平宋崖山復從右
丞范文虎征日本俱有戰功後遷居太倉

從海漕累官至昭勇大將軍運糧副萬戶
歲涉風濤不憚勞苦泰定丙寅督運赴北
卒於京師都堂以公勤勞王事命有司遣
公車舁櫬歸葬所過郡縣祭奠如法明年
三月追封東海郡侯謚曰宣惠弟興仁字
義之不以門閥自矜謙沖尚義雖淹家食
人皆謂將試用矣子起賢字思顏龔忠翊
校尉松江嘉定所海運千戶

劉必顯號玉溪世居崇明至元乙亥歸附王
招討從哈刺兀元帥收溫治福建授武畧
將軍復從張宏範征崖山辛巳從李元帥
征日本後從事餽餉遷居太倉累官至信
武將軍海漕副萬戶大德乙巳卒於家三
子居賢居仁居義居仁武畧將軍慶紹所
海運千戶

朱明達字顯之世居崇明乙亥歸附王招討

帥師入閩多所全活丙戌從征交趾歿其
舟無遺失全軍而返壬辰遷居太倉官海
漕至承信校尉運糧上千戶中年引疾終
於家二子文德號菊巖承務郎太尉府長
史丁父艱遂不仕扁其西齋曰可閒以見
志士英號松巖將仕郎同知濟寧府事亦
中年引退於是父子兄弟俱辭祿人以是
高之且教子有義方再世享良閨門雍肅

睦宗恤鄰咸服其義慶延於家文德子子
鈞字可元今承事郎連州判官以祖蔭讓
士英子子銓子銓字可章龔忠翊校尉溫
台等處海運千戶皆福祿未艾傳家詩禮
美譽繩繩爲鄉閭表法云

顧德號可軒本維揚崇明人世以明經取科
第者蟬聯擲比德生十三歲而孤哀毀骨
立人稱其孝及冠特立不羣至元辛卯遷

居太倉以課耕節用生計頗豐事母極甘
旨周卹親鄰靡所不至延師教子應接賓
客皆盡禮意喜藏書不樂仕進每戒子孫
宜以儒術致仕版晚年二子旣官遂優游
以享榮養廣徵天師因其號命之曰可軒
處士延祐丁巳終於家文敏公趙子昂爲
銘其墓歿後十年以子官應得恩例贈從
仕郎崑山州判宜長子新字純甫性慈仁

敏於政治善與人交累官至承事郎龍興路錄事後至元丙子卒於官次子信字善夫少好學通經史素性雅淡志趣高潔尤工於書翰與趙敏公游文敏嘗題其書曰崑山顧善夫從吾游甚久於事頗信實而又好學書時時求吾書持歸刊石故吾亦樂爲之書其見重如此信累官金玉局使陞杭州軍器同提舉以母宜人陳氏年踰

八袞兄從官遠方言諸有司解印歸侍母
歿服闋閉戶讀書不求聞達至正辛巳郡
守以信諳知水科薦之都水司力辭不就
晚年自號玉峯樂善處士云

楊茂春字子東崇明西沙人遷太倉父俊傑
以茂春貴贈松江嘉定所副千戶茂春素
負剛毅處身謙抑歸附初省檄充掌管海
船總把從征甌閩招討諸山寨及防護珍

貨赴北有功至元丁丑檄充管船千戶辛
卯漕府奏授進義副尉海道運糧百戶佩
銀符秩滿進階忠顯陞千戶改金符累官
至武畧將軍松江嘉定所副千戶公年踰
六十即欲求閑不聽至治壬戌得請以武
德將軍致仕卒年八十五生五子應龍蚤
卒應鳳寶慶等處田賦提舉應辰應雷天
祐及諸孫並未仕應龍子元正以膺世賞

范文富字潤甫崇明西沙人歸附後尋探水
脉叛開海運以膏預焉至元戊子以功授
保義校尉運糧副千戶遷居太倉歿後公
之正配以節約慈儉家道益昌而樂施無
倦元統甲戌年九十六蒙恩賜帛二緡有
司以高年耆德表其門明年卒年九十八
次子應禮進義副尉運糧百戶歷五考以
恬退職不遷大德甲辰併三漕府爲一以

例閑退然歲事海運親涉風濤不憚勞苦
嘗餽運高麗及交趾出征軍糧洎皇慶壬
子承漕檄探水指引免致淺澁俱有勞績
各省咨保方擬陞用而公無意於祿仕矣
竟令終於牖下子孫甚衆將有膺世賞者
焉

藥良輔號南山世居揚州崇明西沙至元壬
午來贅玉溪劉萬戶因居太倉公爲人警

敏儀觀竒偉頗有籌畧侍玉溪公服勤起家備嘗勞苦艱險不避事上撫下咸得其歡心濟惠賙卹隱德及人者衆如捨膏腴於琳宮梵刹歲時脩供以報罔極亦其一事也辛卯歲初官海漕授進義副尉佩銀符運糧百戶大德庚子換金符轉忠翊爲千夫長再兩遷至忠顯校尉松江等處運糧千戶歲押綱運赴北累受錫賚宗黨以

爲榮方期進用至大庚戌年方四十遽惟
未疾終於家所蘊不盡施人共惜之二子
世堅世慕世堅字仲節材質兼茂克荷舊
業今襲忠翊校尉松江嘉定所海運千戶
世濟厥美云

黃成字君美崇明西沙人遷居太倉母朱氏
即左丞清之妹也爲人剛毅體貌瓌奇以
諳練海道至元辛巳左丞范文虎征日本

進南辟置麾下多委力焉戊子漕府奏授
保義校尉運糧副千戶佩銀符辛卯遷忠
緬校尉陸千戶換金符大德癸卯丁母憂
即謝事至大辛亥卒子元亨元德未仕女
妙吉有賢行壻章蒙古臺名良輔前陝西
省宣使辭口家食殆將試用矣

吳貴字和卿本淮西安豐人以忠武校尉宜
興奕管軍上百戶因鎮戍居此遂爲郡人

性勁直抑強扶弱口口以嚴毅有過輒面折之然好善樂於爲義至順辛未歲荒疫遺棄滿道殍死者盈途塞河貴悉收錄存養且捐貲募人撈撻浮屍數千軀就西關外積薪焚化祭而瘞其骨焉其功及存歿類此今辭官就閒長子彥深襲軍職次子彥博從事省府入任餘子皆成長貴雖年漸高而尤強健人謂陰德之報云

施文勝字文質揚州崇明人也父宗慶字善甫性質樸不事外飾善於治生大德間遷居太倉積勤起家以高貲聞於鄉里文勝謙抑好禮壯歲入京師當路貴游皆願納交共相延譽爲之薦引直事相府後至元己卯二月中書奏授從仕郎太保府長史即推榮其父封承直郎平江路總管府判官母周氏妻王氏皆封恭人宗族稱其孝

義明年四月擢徵事郎集賢院都事至正
癸未春以材選授承事郎利用監經歷繼
丁父憂歸自筮仕凡三授官俱係京秩皆
有陞轉人以是榮羨焉今雖居制方當盛
年殆將揚歷要途進未已

俞君登字泰卿三山長樂人早孤母黃氏親
授以書長游公卿間丁國艱不及試用歸
附後當路累招不起自號知止翁晚年居

太倉延祐甲寅卒故友謚曰貞節先生子
焯字元明登丁卯進士第

許必進字宗尹福清人太學生歸附後依同
舍生王賡居於胡川鄉自號西坡子子升
子同脩舉子業

杭仁字仁甫紹興上虞人以從事海漕遷居
太倉性好善樂義捐貲施糶以周貧乏凡
力所可及者無不爲也其子禮字和卿恪

承父志且又色養不違女妙壽芳年喪夫
誓不再適節義一門鄉閭共美至元六年
仁年八十有五有司表其門曰高年耆德
仍復其家先是大司徒以壽山居士號之
至是集賢院復授以永真處士之號仁今
年垂九十夫婦尤康健云

釋老

梁吳興沙門惠嚮姓懷氏久居內寺一旦歸省

至馬鞍山放錫禪坐於山脅石室間二虎
爲侍思欲立精舍忽有神人見於前曰請
助千工用佐成事是夜風雹暴作撲斲之
聲聞於遠近翌日殿基成竒石轟壘非人
力所能遂建寺焉嚮後駐錫揚干江心蝦
蟄山於此入寂山上僧院有碑刻載崑山
創寺本末頗詳

唐僧法欽圓明人本姓朱母管氏夢蓮生戶樞

因孕生欽二十二以文學充賦道經丹徒
鶴林寺見素禪師一言默契遂投出家久
之辭去素曰乘流而行逢徑即止至杭之
徑山遂占龍湫居焉剪荆榛而興蘭若永
泰初天日中于山人投欽出家訓名崇慧
慧善誦俱胝咒大有神驗大歷三年入京
與道士史華角法勝之問爲欽之弟子因
詔入內賜號國一貞元八年示寂於杭州

龍興寺謚曰貞元大覺禪師

塔銘

漢清化師全付崑山人隨父賈販之豫章聞禪師之盛求出家學成自仰山還故國錢忠獻王賜以紫方袍不受改賜衲衣號純一禪師師曰吾非飾詞恐後人倣吾而逞欲

耳開運中坐亡有大風震林木焉

傳燈錄

宋僧德聰本張潭仰氏七歲出家於杭州慈光院太平興國三年抵華亭余山二虎自隨

天禧元年亦寂於山沙門口口偕道侶三

十二人建塔七級遷聰墓於西峯今善道昭寺

侶相次焚身供養口亦說偈捨身

僧良玉字蘊之慧聚寺僧也行業精高旁通

文史善書札工琴碁因遊京師梅聖俞見

而嘉之以名聞於朝賜以紫衣及東歸復

以詩送之玉後潛遁故山專以講經爲務

號所居曰雨花堂

僧道川本弓手翟超也以勇力名被差捕賊
口土山下將軍廟下忽有所悟徑投東齋
爲僧遍遊江湖間道遇虎馴伏不動有口
誦金剛經行於世

僧法全本姓陳棄家從道川爲僧叅請勤至
一日行惠應廟偶撞其首於柱間忽然大
悟觀者見其光彩飛動而不自知也自此
遍走叢林道價日增後主湖州道場山自

號無庵

僧子元本姓茅母柴氏夢僧自稱華光生元
幼孤投延祥通講主出家爲僧後聞鷄聲
悟道追紹晉遠法師 宗教勸脩淨業

淳興丁酉得罪編置江州久之得釋州爲
其聞召入德壽宮講說稱旨賜金爛師號
慈照導師辛丑示寂於泃川鄉倪普建家
茶毘後華亭金吾里吳覺昌以骨建塔賜

名最勝

道士易如剛字仁甫饒州安仁人幼孤入龍
虎山爲道士後主茅山玉晨觀移主崇禧
慶元初以符法召住三茅壽寧觀授太乙
宮高士遷左右街道錄後爲靈應善照觀
開山住持寧宗御書觀額及止堂扁賜之
嘉定六年賜號通妙先生十四年又加葆
真紹定辛卯二月六日羽化

本朝廷祐三年七月加封通妙葆真文教真人
揚二官居湖川塘過至人傳以道術能於冬
間投蓮實於水頃刻發葉開花與夏池無
異嘗於茶肆啜茶索水一椀咒之遂成銅
錢以酬茶直又嘗剪紙爲鶴便能飛舞能
於青天倏起風雲奇異不可悉舉一日約
葉月堂陳西山往山中尋葉泄其謀遂不
果行旣而葉死

本朝王惟一自號景陽子本括蒼人以從父官
華真遂家焉嘗以儒飾吏事已而棄吏從
方外遊遇至人授以還丹九轉心領其要
乃著景陽明道篇金丹樞要先天易贊祈
禱問答行雷心傳道法精妙凡六書晚年
寓樊涇嶽祠泰定丙寅正月三日自筆其
遺事及偈畢端坐而逝顏貌如生火龕之
際震鶴盤旋於上久之而去龕既灰而靈

骨挺然

殷震亨字元震號在山淮東崇明人也其族
皆海漕顯宦公歿以儒爲簪褐初居蘇城
大德初來爲嶽宮開山住持乃於嶽樓之
右築室治圃藏書史蒔花木爲宴息之所
廣徵尺師扁曰在山吟墅日與騷人墨客
觴詠於其間公性嗜書經史外尤好岐黃
術諸所撰錄有在山吟稿簡驗方傳釋感

應篇皆鉞梓以行閱世八十五以至順壬
申七月十八日跌坐長逝及殯龕燼而靈
骨巋然

神靈

本朝金應龍其先居府城草橋今郡居之冲川
鄉自高祖錡以英偉剛烈死而爲神世顯
靈異廟食甚盛至應龍靈蹟尤著書降附
託死生禍福昭答如響自浙江被於淮甸

家祀戶奉廟貌像設無處無之近代神靈
鮮有其比

本朝茅氏者崇明西沙人及笄歸於都水朱虎
生二子大德癸卯虎父左丞清以盈滿得
罪官籍其家茅氏年方三十二歲沒屬官
醫師提點茅氏與二子衣裾連結號泣不
從師提點以勢凌逼者數日莫奪其志虎
故舊王大卿劉萬戶張院判拙庵長老等

哀而嘉之相與出鈔回贖遂獲從使於大
都左警巡院昭回坊永安尼寺僑寓明年
四月卒於寺歿後三十七年虎兄子謙言
其節行於有司省部體勘得實後至元己
卯五月移咨行省旌表門墓錄付史館

崑山郡志卷第五

崑山郡志卷第六

浦城楊讓纂

土貢

唐六典及宋元豐土貢有蛇床子見於吳郡志
而玉峯志以蛇床與苧布皆在歲貢清遠
香黃草布亦或貢焉今皆不見唯歲有拘
收皮貨翎毛爾

貉皮二十九張

一
二
三
四
五
六
七
八
九
十
十一
十二
十三
十四
十五
十六
十七
十八
十九
二十
二十一
二十二
二十三
二十四
二十五
二十六
二十七
二十八
二十九
三十
三十一
三十二
三十三
三十四
三十五
三十六
三十七
三十八
三十九
四十
四十一
四十二
四十三
四十四
四十五
四十六
四十七
四十八
四十九
五十
五十一
五十二
五十三
五十四
五十五
五十六
五十七
五十八
五十九
六十
六十一
六十二
六十三
六十四
六十五
六十六
六十七
六十八
六十九
七十
七十一
七十二
七十三
七十四
七十五
七十六
七十七
七十八
七十九
八十
八十一
八十二
八十三
八十四
八十五
八十六
八十七
八十八
八十九
九十
九十一
九十二
九十三
九十四
九十五
九十六
九十七
九十八
九十九
一百

黏殺羊皮二百四十尺

羊皮八尺

翎毛三千七百根

土產

按隋志川澤沃衍有海陸之饒故今高下悉田
稻色多種食物所出水陸畢備而海錯魚
鮮爲尤盛也

巧石出馬鞍山後石工探穴得巧者斲取玲

瓏植菖蒲芭蕉置水中好事者甚貴之
他處名曰崑山石亦爭來售然恐傷山
脉鑿者有禁止安陳先生立碑在縣廳
今間亦私取而得益可竒其名益重

芋布 黃草布 藥班布

雜記

晉蘇峻之亂吳郡顧衆爲楊威將軍義興太守
還吳潛圖義舉時吳國內史庾冰奔會稽

峻以蔡謨代之將軍張慙爲峻收兵於吳
衆遣人諭慙慙從之衆遣告謨曰衆已潛
合家共待時而奮謨乃檄衆爲本國督護
衆從弟護軍叅軍颺爲前軍督護吳中人
士同者響應峻遣將宏徽鼓行而前衆與
颺慙要戰于高祚大破之謨以庾冰還任
便去郡衆遣颺率諸軍屯無錫恐賊從海
虞道入衆自往備之賊帥張健馬流攻無

錫颺等大敗永亦失守健等據吳城衆自
海虞由婁縣東倉遇賊賊破之義軍又集
進屯烏苞

蘇峻反遣其徒管商等攻吳郡焚吳縣海鹽
嘉興敗諸義軍峻敗後其將劉微又率衆
數千浮海入婁縣詔以郗鑒都督諸軍事
討平之

宋蒯恩字道思蘭陵承人從武帝征孫恩戰於

婁縣箭中右目

隋大業九年劉元進舉兵應揚元感將渡江而
元感敗吳郡朱燮晉陵管崇亦舉兵共迎
元進據吳郡衆至十萬燮還俗道人長不
滿七尺涉獵經史微知兵略時爲崑山博
士知天下將亂謀於學而起兵起者如歸
自東陽至京口千餘里並受燮節度德隱
居常熟美姿容少不藉長七尺三寸推崇

爲主場帝將吐萬緒進軍逼之相持百餘日爲緒所敗保於黃山緒復破之燹戰死帝令江都郡丞王世充發淮南兵擊之世充旣渡江元進與崇俱爲世充所殺

唐武德三年李子通渡江攻沈法興法興走吳郡賊帥聞人遂安遣其將葉孝辯迎之法興中塗悔欲殺孝辯更向會稽孝辯覺之法興窘迫赴江溺死杜伏威將王雄誕擊

子通子通降聞人遂安據崑山無所屬伏
威使雄誕擊之以崑山險隘難以力勝乃
單騎造城下陳國威靈語以禍福遂安感
悅率諸將出降於是伏威盡有淮南江東
之地

光啓初劇賊剽崑山招討使周寶遣將張
郁戍海上郁叛刺史王蘊謂將兵還休不
設備禦郁遂大掠蘊嬰城守寶遣兵討郁

郁保常熟遂走海陵

淮南將楊行密寇姑蘇別將秦裴屯崑山
吳越將顧全武擊裴圍之於崑山裴援絕
不降頗殺傷士卒全武爲長檄諭之裴乃
納款

宋嘉祐中崑山縣海上有一舡旣折風飄泊岸
船中三千餘人衣冠如唐人見人皆慟哭
語言書事皆不可曉行則相綴如鴈行久

之自出一書示人乃唐天祐中授屯羅島
首領陪戎尉告又有一書乃上高麗表蓋
東夷之臣屬高麗者時贊善大夫韓正彥
爲令召其人犒以酒食且爲治其梳教以
起倒之法各以手捧首而輟船中有麻子
大如蓮的蘇人求種之初歲亦如蓮的次
年漸小後只如中國麻子

建炎四年二月二十五日北騎至姑蘇宣

撫使周望移軍退保崑山泊舟馬鞍山下
湖邊吏方用印忽旋風入舟印與文書盡
墮水相視駭愕急使水工探之不獲望懼
北兵之來襲欲急走通惠鎮而失印爲撓
留吏求之吏禱於山神靜濟侯曰苟不獲
且將得罪必焚廟而行縣令亦懼乃作堰
捍水踏車涸之畚插如雲鑿數尺得印已

淪泥中矣

夷堅志

無相禪院今寺在沔川鄉地名石浦乃邑人
衛涇所居嘗有相者惜其院名無相恐不
至登庸後衛公果止於叅知政事

異事

古之神降於莘石言於宋穿井得羊其見於春
秋內外傳又若史之五行志所載者不可
勝計皆有事應詎可謂未必皆實而略之
也

晉元康中吳郡婁縣懷瑤家忽開地中有犬聲
視聲所自發有小穿犬如演穴以杖刺之
入數尺覺有物掘視得犬子雌雄各一目
猶未開形大於常犬長老或云此名犀犬
得之者富昌當養以日未開還置穿中覆
以磨礮宿昔發視失所在矣瑤家亦無他
大興中吳郡府舍中又得二枚物如其初
其後太守張茂爲吳興兵所害尸子曰地

中有犬名曰地狼夏鼎志曰掘地得狗名

曰賈蓋此類也

出法苑珠林搜神記

梁鬼築慧聚寺殿基

見寺院條

慧聚寺大殿二柱有天書如今之大篆非刊

刻者一勣溪火三字一蜿蜒蟠結若符篆

而不可考在柱裏向人所不見大小近二

尺許好事者或模印之

通鑑本末

後唐時慧聚寺紹明律師居半山彌勒閣一夕

夢神人曰簷前古桐下有石天王像與銅鐘師宜知之明旦掘地果獲此二物形制極古前輩嘗有詩云一旦石像欲發見先垂景像鳴高岡

宋咸平元年夏四月崑山縣漁婦李氏張冒河上得白龜如錢大其色玉瑩電眸末尾宮畫粲然婦取歸授兒爲戲又恐傷人縱於河頃之龜復在網如是者三婦怪之復棄

去中夜岸有火熒熒往觀之龜在焉因取以歸近村王道榮留龜置神像前失之道榮私念此或靈物若虔禱當復見則必獻諸官禱之忽自鼠竇中出精熒愈於前乃獻於縣令李維維上之郡陳省華守蘇州之二歲也異而神之即具表以聞時張君房客於蘇省華以白龜事訪之君房曰按孫氏瑞應圖云龜千歲巢蓮葉之上是龜

之質固可巢於蓮葉而其出也又將以應
於千歲之運乎且其色白白西方也豈其
應在西方乎龜者歸也西方其有逆命不
廷之事畏威懷德歸我乎明年朔方叛帥
李繼遷貢馬請命遂有銀夏綏宥四鎮之
拜君房常爲之頌省華尋徙漳州明年秋
賦試進士崑山進白龜詩口異記
元豐四年夏夏駕里民羅滿獲一鯉長可二

尺歸將治之則化爲石佛羣觀嗟異一老
父曰近年水濱有赤光如日殆其祥也因
迎於家時慧聚寺僧守齋夜艤舟於此夢
白衣女子託宿曰我舟俄覆父與夫皆溺
死師幸容我齋拒不可女曰假一篋宿我
何傷乎齋恍然從之開篋則遂以入遂驚
寤詰旦至羅氏家見石像初出身猶沮如
叩之知爲魚化也齋嘿念與夢合因乞以

歸酬以貲羅氏卻不受齋奉像至舟僕懼
穢觸開篋納之益符昨夢矣像今在妙智
院陳明復作記以識其事

崑山雖去松江不遠舊無潮汐紹興中方有
之猶不及二十里外淳熙中有一道人誦
讖云潮過夷亭出狀元李樂菴以語知縣
葉子強遂建問潮館於駟馬橋下後潮果
過夷亭衛涇遂魁天下

紹定中張廣年權縣事譙樓有巢鶴中弋帶
箭造廷哀若有所訴廣年視箭首字得弋
人姓名追懲之鶴乃去

本朝石浦真如觀真武殿前新甃石池一夕大
風雨雷電翌日滿池皆大金魚莫知所從
來

崇明觀創造既完而大殿供臺木備延祐二
年八月十八日早忽有樟木浮至觀門東

溝內長丈餘廣四尺溝水淺狹莫究所來
取以充用多寡適足

考辨

崑山古之婁縣或云婁在漢爲膠後避錢武肅
王諱改今名按自吳張昭陸遜封婁侯婁
縣之名屢見史傳此言非也漢書云改於
王莽時

三江舊蹟謂東北入海曰婁江按今府城東

關曰婁門其下七十里即古婁縣皆以婁江得名自是而下乃出海之孔道並無迂曲實有吞湖吐海之勢婁江舊蹟昭然可尋而先儒所辯三江皆不及此今糧艘屯聚又訛曰劉家港

今州遷治所地名太倉或曰春秋吳王之倉或曰漢吳王濞之倉或曰五代吳越王之倉按濞都廣陵不應太倉遠在七百里之

外枚乘說漕所指太倉乃在海陵今泰州也若曰錢氏之倉不唯去其國都太遠且屢爲淮南所陷殆其邊境不可儲蓄亦不宜曰太倉據此春秋吳王之倉今又曰東倉地居吳東益可信矣又按晉書顧衆傳蘇峻反賊帥張健據吳城衆自海虞由婁縣東倉與賊別帥交戰則東倉之名其來亦甚遠也

郡國志載婁縣山下有巫咸故宅止言婁縣
而不言何山按琴川志引越絕書云虞山
巫咸所居則咸蓋常熟人常熟非婁縣所
分疑郡國志誤

中吳紀聞云舊圖經云外岡青岡五家岡蒲
岡菘岡徘徊岡福山岡並作吳縣界今決
第而殺之其上之四屬崑山下之三屬常
熟言地之遠近與吳縣大相遼絕玉峯志

云今外岡蒲家岡分屬嘉定崑山所餘唯青岡五家岡而已又云青岡在縣東北四十二里今按青岡亦屬嘉定即中岡身也其及崑山者唯地脉相連耳

慧聚寺開山僧乃慧嚮今有古石像在靈山院小洞中俗人扣之鏗然有聲遂呼爲響大師甚可笑也

山寺古上方有孟郊張祐留題詩或云郊隨

父任崑山尉因有篇什按韓文公郊墓志
云父庭玠娶裴氏女選而爲崑山尉生郊
及二季艷郢而卒考此語是郊時方幼稚
能詩上方留題或者疑乃其父庭玠所作
不可知或又云郊後長大問其母身所生
之地母云父任崑山尉時郊遂遊吳乃留
題事無考證不可信撫言載曰樂天出守
蘇州科場將開方干來求解頭而張祐適

至無何二人言語喧爭於席上由是二人
俱不得解頭而去祐之留題必是樂天守
蘇時也

舊州鼇峯橋橋東即縣倉時宰以民樂然輸
致故曰樂輸橋今上人謬謂山神之佐曰
朱國公者嘗落書於此今俗曰落書橋其
實非也

崑山郡志卷第六